



قجابه ستيأوسها كراجان نكري كلنتن
**PEJABAT SETIAUSAHA KERAJAAN
NEGERI KELANTAN**
Bahagian Pengurusan Sumber Manusia
Blok 2, Aras 1, Kota Darulnaim,
15503 KOTA BHARU
KELANTAN.

Tel : 09-748 1957
Pengarah : 09-748 5826
Faks : 09-747 0890 /
747 4152 / 748 2652
E-mail : bpsm@kelantan.gov.my

Ruj. Kami: SUK.D.200(06)600/9 Jld 16 (51)
Bertarikh : 24 Jamadilawal 1443H
29 Disember 2021

Kemajlis,

Semua Ketua Jabatan Negeri

Semua Ketua Pengurusan Pihak Berkuasa Tempatan Negeri

Semua Ketua Pengurusan Pihak Berkuasa Berkanun Negeri

Semua Ketua Pengurusan Urusetia Kerajaan Negeri Kelantan

Semua Ketua Bahagian Pejabat Setiausaha Kerajaan Negeri

YBhg. Dato' / YM Tengku/ Tuan / Puan,

**PEKELILING PERKHIDMATAN NEGERI BILANGAN 11 TAHUN 2021
DASAR PELAKSANAAN IMUNISASI COVID-19 BAGI PEGAWAI PERKHIDMATAN AWAM NEGERI**

Dengan hormatnya saya diarah merujuk kepada perkara di atas.

2. Dimaklumkan bahawa Majlis Mesyuarat Kerajaan Kali Ke 22/2021 yang bersidang pada 3 November 2021 membuat keputusan bersetuju menerima pakai Pekeliling Perkhidmatan Negeri Bilangan 11 Tahun 2021 Dasar Pelaksanaan Imunisasi COVID-19 Bagi Pegawai Perkhidmatan Awam Negeri.
3. Pekeliling Perkhidmatan ini **berkuat kuasa mulai 3 November 2021**.
4. Sehubungan itu, bersama-sama ini dikemukakan Pekeliling Perkhidmatan berkenaan untuk perhatian dan tindakan pihak YBhg. Dato' / YM Tengku/ Tuan / Puan selanjutnya. Pekeliling Perkhidmatan ini boleh dimuat turun melalui laman web www.kelantan.gov.my.

Sekian, terima kasih

"RAJA BERDAULAT, RAKYAT MUFAKAT, NEGERI BERKAT"
"WAWASAN KEMAKMURAN BERSAMA 2030"

Saya yang menjalankan amanah,

(HAJI MOHD ZAKI BIN YUSOFF)

Pengarah Bahagian Pengurusan Sumber Manusia

**b.p. SETIAUSAHA KERAJAAN
NEGERI KELANTAN**

s.k.: - YBhg. Dato' Timbalan Setiausaha Kerajaan (Pengurusan)

SUK.D200(06)600/9/Jld 16(51)



KERAJAAN NEGERI KELANTAN

PEKELILING PERKHIDMATAN NEGERI BILANGAN 11 TAHUN 2021

**DASAR PELAKSANAAN IMUNISASI COVID-19
BAGI PEGAWAI PERKHIDMATAN AWAM NEGERI**

1. TUJUAN

- 1.1 Pekeliling Perkhidmatan ini adalah bertujuan untuk menjelaskan keputusan Kerajaan Negeri Kelantan mengenai Dasar Pelaksanaan Imunisasi COVID-19 bagi pegawai Perkhidmatan Awam Negeri Kelantan.

2. LATAR BELAKANG

- 2.1 Kerajaan telah melaksanakan Program Imunisasi COVID-19 Kebangsaan (PICK) mulai 24 Februari 2021 untuk mengurangkan kesan jangkitan akibat virus COVID-19.
- 2.2 Dalam usaha untuk memberikan keyakinan dan jaminan kepada orang awam serta memastikan kelancaran penyampaian perkhidmatan awam kepada rakyat, Kerajaan telah menetapkan supaya semua pegawai melengkapkan imunisasi COVID-19.
- 2.3 Seseorang pegawai adalah tertakluk kepada syarat-syarat perkhidmatan selaras dengan Fasal (2) Perkara 132 Perlembagaan Persekutuan. Pegawai juga adalah tertakluk dan terikat dengan Surat Aku Janji yang ditandatangani oleh pegawai apabila dilantik ke dalam perkhidmatan awam Negeri di bawah subperaturan 20(3) Peraturan-Peraturan Pegawai Awam Negeri Kelantan (Pelantikan, Kenaikan Pangkat dan Penamatan Perkhidmatan) 2021 dan hendaklah mematuhi, antara lain, apa-apa Perintah-perintah Am, pekeliling, surat pekeliling, peraturan dan arahan lain yang dikeluarkan oleh Kebawah Duli Yang Maha Mulia Sultan dari semasa ke semasa sepanjang perkhidmatannya dalam perkhidmatan awam.
- 2.4 Subperaturan 20(8) Peraturan-Peraturan Pegawai Awam Negeri Kelantan (Pelantikan, Kenaikan Pangkat dan Penamatan Perkhidmatan) 2021 Ketua Jabatan boleh pegawai yang sedang berkhidmat untuk menjalani

pemeriksaan kesihatan atau mengemukakan maklumat kesihatan yang disahkan oleh pengamal perubatan berdaftar apabila Ketua Jabatan berpandangan terdapat keperluan perkhidmatan.

- 2.5 Oleh itu, Pekeliling Perkhidmatan ini selaras dengan subperaturan 62(2) Peraturan-Peraturan Pegawai Awam Negeri Kelantan (Pelantikan, Kenaikan Pangkat dan Penamatan Perkhidmatan) 2021 yang memberi kuasa kepada Setiausaha Kerajaan Kelantan untuk mengeluarkan panduan bagi menjelaskan pelaksanaan dasar ini.
- 2.6 Dalam hal ini, apa-apa tindakan seseorang pegawai hendaklah selari dengan dasar Kerajaan berhubung dengan pelaksanaan imunisasi COVID-19.

3. TAFSIRAN

3.1 Bagi maksud Pekeliling Perkhidmatan ini:

- (a) **“imunisasi”** mempunyai erti yang sama yang diberikan kepadanya dalam subseksyen 2(1) Akta Pencegahan dan Pengawalan Penyakit Berjangkit 1988 [Akta 342];
- (b) **“pegawai”** mempunyai erti yang sama yang diberikan kepadanya dalam peraturan 4 Peraturan-Peraturan Pegawai Awam Negeri Kelantan (Pelantikan, Kenaikan Pangkat dan Penamatan Perkhidmatan) 2021 termasuk pegawai lantikan tetap, sementara, *Contract Of Service (COS)*, *Contract For Service (CFS)*, berelaun dan sambilan,;
- (c) **“pengamal perubatan berdaftar”** mempunyai erti yang sama yang diberikan kepadanya dalam peraturan 4 Peraturan-Peraturan Pegawai

Awam Negeri Kelantan (Pelantikan, Kenaikan Pangkat dan Penamatan Perkhidmatan) 2021;

(d) **“Sijil Digital Vaksinasi COVID-19”** ertinya sijil imunisasi COVID-19 yang dijana daripada aplikasi MySejahtera.

4. DASAR PELAKSANAAN

4.1 Pegawai adalah bertanggungjawab untuk mendapatkan dos imunisasi COVID-19 yang lengkap sebagaimana yang ditetapkan oleh Kerajaan. Ini bertujuan untuk memastikan persekitaran tempat kerja yang selamat dan penyampaian perkhidmatan serta produktiviti perkhidmatan awam berada pada tahap optimum.

4.2 Pada atau selepas 1 November 2021 –

(a) Pegawai boleh diarahkan oleh Ketua Jabatan untuk mendapatkan dos imunisasi COVID-19 yang lengkap dengan cara mengemukakan Sijil Digital Vaksinasi COVID-19; dan

(b) Mana-mana pegawai yang gagal mematuhi arahan Ketua Jabatan boleh menyebabkan pegawai dikenakan tindakan tatatertib.

4.3 Sekiranya pegawai –

(a) Tidak dapat melengkapkan dos imunisasi COVID-19 atas sebab kesihatan, pegawai boleh diarahkan oleh Ketua Jabatan untuk membuat pemeriksaan kesihatan kepada pengamal perubatan berdaftar bagi mengesahkan bahawa pegawai tidak layak untuk menerima imunisasi COVID-19 dari segi perubatan (*medically ineligible*);

- (b) telah mendapat pengesahan daripada pengamal perubatan berdaftar bahawa pegawai tidak layak untuk menerima imunisasi COVID-19 atas sebab kesihatan, pegawai boleh diarahkan oleh Ketua Jabatan untuk membuat ujian pengesanan COVID-19;
- (c) disahkan oleh pengamal perubatan yang berdaftar bahawa pegawai layak untuk menerima imunisasi COVID-19, pegawai boleh diarahkan oleh Ketua Jabatan untuk mendapatkan dos imunisasi COVID-19 yang lengkap dengan cara mengemukakan Sijil Digital Vaksinasi COVID-19; dan
- (d) gagal mematuhi mana-mana di perenggan (a),(b) atau (c), pegawai boleh dikenakan tindakan tatatertib.

- 4.4 Walau apa pun ketetapan di perenggan 4.2 dan 4.3, Ketua Jabatan boleh, pada bila-bila masa, mengarahkan mana-mana pegawai yang belum mendapatkan dos imunisasi COVID-19 yang lengkap untuk membuat pemeriksaan kesihatan bagi menentukan status kesihatan terkini pegawai. Sekiranya pengamal perubatan berdaftar mengesahkan pegawai layak untuk mendapatkan imunisasi COVID-19, pegawai boleh diarahkan oleh Ketua Jabatan untuk mendapatkan dos imunisasi COVID-19 yang lengkap dengan cara mengemukakan Sijil Digital Vaksinasi COVID-19. Mana-mana pegawai yang gagal untuk mematuhi arahan tersebut boleh dikenakan tindakan tatatertib atau ditamatkan perkhidmatan.
- 4.5 Bagi memastikan dasar ini berjalan dengan lancar, Ketua Jabatan boleh mempertimbangkan apa-apa kaedah yang bersesuaian untuk menguruskan mana-mana pegawai yang tidak mendapatkan atau melengkapkan imunisasi COVID-19 termasuklah mengarahkan pegawai untuk membuat ujian pengesanan COVID-19. Apa-apa kos yang berbangkit daripada ujian pengesanan itu hendaklah ditanggung sendiri oleh pegawai.

- 4.6 Walau bagaimanapun, bagi pegawai yang tidak layak untuk menerima imunisasi COVID-19 dari segi perubatan (*medically ineligible*), kos untuk membuat ujian pengesanan COVID-19 akan ditanggung oleh Kerajaan.
- 4.7 Semua penjawat awam Negeri Kelantan perlu melengkapkan imunisasi COVID-19 untuk mendapat kesihatan yang sempurna dan memberikan keyakinan serta jaminan kepada orang awam bagi memastikan kelancaran penyampaian perkhidmatan awam yang lebih efisien kepada rakyat.

5. **TARIKH KUAT KUASA**

Dasar Pelaksanaan Imunisasi COVID-19 bagi pegawai Perkhidmatan Awam Negeri Kelantan ini berkuatkuasa mulai **3 November 2021**.

8. **PEMAKAIAN**

Tertakluk kepada penerimaannya oleh pihak berkuasa masing-masing, Pekeliling Perkhidmatan ini pada keseluruhannya dipanjangkan kepada Pihak Berkuasa Berkanun Negeri dan Pihak Berkuasa Tempatan Negeri.

Sekian, terima kasih.

“RAJA BERDAULAT, RAKYAT MUAFAKAT, NEGERI BERKAT”
“WAWASAN KEMAKMURAN BERSAMA 2030”



DATO' HAJI NORAZMAN BIN ABD GHANI, D.P.S.K (Kelantan)
Timbalan Setiausaha Kerajaan (Pengurusan)

PEJABAT SETIAUSAHA KERAJAAN
NEGERI KELANTAN

Bertarikh : 24 Jamadilawal 1443H
29 Disember 2021

SENARAI EDARAN :

- Yang Berhormat Dato' Setiausaha Kerajaan Negeri Kelantan
- Semua Ketua Jabatan Negeri
- Semua Pihak Berkuasa Berkanun Negeri
- Semua Pihak Berkuasa Tempatan
- Semua Ketua Pengurusan Urusetia Kerajaan Negeri Kelantan
- Semua Ketua Bahagian, Pejabat Setiausaha Kerajaan Negeri Kelantan